

Vangzsam youq swyez danvih gunghcoz, bingzseiz gig launyaenq, gaenq ndaej 30 lai bi lo, bungz raen dahsau naj lij hoengzfwdfwd, ngaem-gyaeuj byaij gvaqbae, caj dahsau byaij bae gyae le, lij nyaenx mbouj ndaej ngeux gyaeuj dauq laeng yawjyawj. “Lau maz, beixnuengx. Ciuq mwngz baenzneix guh, mbouj rox daengz seizlawz cij aeu ndaej mehyah ndeu ne?” Ndaw danvih gyoengq beix-nuengx cungj gip dwk, ciengzseiz gienq de. Hix miz gyoengq mehmbwk gaisau dahsau hawj de, hoeng daihgya caez gwn caeuz seiz, Vangzsam yawj hix mbouj gamj yawj dahsau, cijgoq ngaemgyaeuj gwn ngaiz. Dahsau couh nyinhnaeuz ndaek bouxsai neix caen huk, danghnaeuz mbouj dwg huk couhwdg miz bingh, seizneix dahsau lawz cingznyienh caeuq cungj bouxsai neix gvaq saedcej ha! Vangzsam hix lau, lau yawj aen aek dahsau sangngaungau caeuq fajnaj hausaksak. Doeklaeng, Vangzsam lij boux dog saeg buh cawj ngaiz, gyanghaemh gag bek nyungz.

Vangzsam ciengzseiz ninz youq gwnz mbonq naemj: Seizlawz cij miz bouxbuex ne? Baezlaeng itdingh mbouj lauq bae lo! Vangzsam haeb heuj, dik aen congz geij baez, ninz ndaek bae lo.

Duenhgonq ndaw danvih miz dah sau ndeu heuh Siujyngz, ngamq

·cienlanz sawcuenh·

Gij Yaemmaeuz Aicingz

爱情阴谋

□ Siz Buogzcowg / 石鹏程

diuh haeujdaeuj, aen daiz bangungh de couh caeuq Vangzsam doxdoi, Vangzsam mbouj gamj cingqmienh bae yawj saek baez. Vangzsam cij raen dahsau byoemgyaeuj ndaemndatndat, lij dingqny i gij sing'yaem dahsau gig ndei dingq. Couh baengh haenx, Vangzsam youq ndawsim swheij gag ngeix fajnaj dahsau luenzlili, fouq lwgda rox gangj vah caeuq gij heuj hausaksak.

“Danghnaeuz caeuq dah sau neix gvaq saedcej, couhsuenq hwnj bya sang, roengz ndaw haij, gou hix cingznyienh!” Vangzsam baeznaengz raen dahsau byoem ndaemndatndat haenx, ndawsim gag ngeix.

Ngoenz ndeu roengzban le, Vangzsam raen Siujyngz byaij haeuj suzse cizgungh le, ndawsim hoengq-langlang. Vangzsam sawqmwh gamj-daengz swheij mbei q lai, hozndat

dwk dik aen rin iq henz loh.

Gyanghaemh, beixnuengx cingj Vangzsam bae ndoet laeuj, Vangzsam ndoet laeuj mbouj haenq, mbouj siengj bae. “Mwngz siengj bae gyae Siujyngz lwi? Mbouj siengj couh gaej daeuj!” Beixnuengx naeuz. Beix-nuengx youh nem youq aen rwz Vangzsam son de baenzlawz bae gyae Siujyngz. Vangzsam baez dingq daengz “Siujyngz” song cih neix, ndawsim couh unq liux.

Gwn caeuz seiz, rongh daeng yapmyad, singmax mboujduenh. Lienz ndoet sam boi le, Vangzsam naj hoengzfwdfwd, lumj gaeqmeh ngamq ok gyaeq nei. Song gienh laeujbiz ndoet liux lo, Vangzsam gaenq luenh gangj sam ciengz, luenh diuq luenh ciengq lo.

“Vangz daeggo, seiqgyaiq baenz-neix vangq, couh mbouj miz saek

boux dahsau mwngz hab'eiq ha?” Gyoengqvunz gangriu naeuz.

“Miz…… miz…… dwg…… miz, hoeng……hoeng……” Vangzsam wij dwk naeuz.

“Bouxlawz ha?” Youh miz vunz cam.

“Couhwdg Siujyngz ha, boux dahsau danvih gou ngamq daeuj!” Miz vunz bang de han.

Vangzsam doeksaet dwk, vueng dwk naeuz: “Sou cungj rox la?” Miz vunz naeuz: “Maij couh maij lo, danghnaeuz maij couh bae lwnh de nyi ha.” “Gojnwngz de hix maij mwngz ne?” “Sikhaek dwk denva.”

Vangzsam yied dingq yied gamj-daengz miz dauhleix, sikhaek dwk denva hawj Siujyngz.

“Vei! Mwngz ndei, gou dwg Siujyngz, mwngz dwg bouxlawz?” Soujgih baihaenx cienz daeuj gij sing'yaem seuq dangq haenx. Vangzsam dingq gij sing'yaem haenx, laeuj fiz lumj singj bae dingz ndeu, sikhaek naeuz: “Mwngz ndei ha! Gou dwg Vangzsam ha! Siujyngz mwngz gwn caeuz caengz?” “Mwngz ra gou miz maz saehcingz ha?” “Mbouj miz, mbouj miz, dan dwg siengj coh mwngz camndei ndwi.” “O, yienghneix ha, docih mwngz. Gou nyaengq lo, ndaej-hoengq caiq gangj! Caiqraen!” “Caiqraen!”

(caengz sat)



Gaxgonq miz boux lwnyeuz ndeu heuhguh Dwzgangh, bohme de buenq vaiz, ndaw ranz haemq miz ngaenz, gwndaenj mbouj you. Dwzgangh dwg lwgdog, bohme daz de dangq baenz naedcaw youq gwnz fwngz, gijmaz hong hix mbouj hawj de guh. Yienghneix Dwzgangh couh gvaq cungj swngghoz haeux daeuj aj bak gwn, buh daeuj iet fwngz daenj, baenzgoenz mbouj you mbouj heiq, coengzlaiz caengz cimz gvaq dungxiek dwg baenzlawz.


Ranznden Dwzgangh miz boux lwsai ndeu heuhguh Siujyngz, nienzgeij caeuq Dwzgangh ca mbouj lai, song boux de dwg doengzdoi ndei, ciengzseiz youq itheij guhcaemz. Bohme Siujyngz ndaem reihnaz, ndaw ranz haemq gungz. Siujyngz ngoenzngoenz gyanghaet cungj gaen bohme de bae guh hong, banringz gvaq le cij ndaej bae guhcaemz. De maz cungj rox guh, naengzganq raixcaix.

Miz ngoenz he, Dwzgangh roxnyinh mbwq raixcaix, couh bae ra Siujyngz guhcaemz. Byaij daengz buenq roen yawjraen Siujyngz gwed fag gvak daj ndaw reih dauqma. De byaij gvaqbae, rag fwngz Siujyngz,

naeuz: “Siujyngz, vaiq, cuengq fag gvak roengz, caeuq gou bae guhcaemz.” Siujyngz naeuz: “Mbouj ndaej, gou caeuxcaeux couh bae guh hong, aen dungx iek yae dai lo, gou ma ranz gwn haeux gonq.” Dwzgangh mbouj rox iek dwg maz, hix mbouj rox iek miz geijlai hojsouh, caenh rag faj fwngz Siujyngz mbouj cuengq. Siujyngz naeuz: “Gou iek dwk souh mbouj ndaej lo, gou gwn song vanj haeux sikhaek caeuq mwngz bae guhcaemz.”

Dwzgangh cijndei caj de. Seizneix Dwzgangh siengj: Dungxiek dwk souh mbouj ndaej bae, dauqdaej dungxiek dwg baenzlawz ne? Gou vihmaz mbouj rox ne? Gou yaeq dungxiek baez ndeu yawjyawj. Caenh siengj caenh siengj, Siujyngz okdaeuj lo. Dwzgangh lwnh aen siengifap de hawj Siujyngz nyi, Siujyngz dingq le, bek aek naeuz: “Mwngz siengj bae ra iek, gou ngoenzcog daiq mwngz bae, baujcwn g mwngz ra raen.”

Ngoenz daihngaih haetromh, Dwzgangh lij caengz gwn haeux couh angqvauvau bae ra Siujyngz, Siujyngz gaenq youq ndaw ranz deq de lo. Siujyngz dawz fag gvak ndenq hawj Dwzgangh. Dwzgangh cieq gvaq-



daeuj gwed youq gwnz mbaq, hemq naeuz: “Bae lo, bae ra iek lo.”

Daeuj daengz henz reih haeux-yangz, Siujyngz doiq Dwzgangh naeuz: “Gou guh maz mwngz couh gaen guh maz, yienghneix mwngz couh ra raen iek lo.” Dwzgangh naeuz: “Ndei a, ndei a, gou dingq mwngz.” Gangj sat, gyoengqde couh ndai reih haeuxyangz lo.

Daihgaig gvaq miz song aen cungdaeuz, Dwzgangh sawqmwh gveng fag gvak naengh roengzdaeuj, naiquenekuek dwk naeuz: “Siujyngz, gou guh mbouj ndaej lo, gou siengj gwn haeux.” Siujyngz byaij daengz henz ndang de, naeuz: “Ndei a, mwngz ra raen iek lo, roxnyinh baenzlawz caengz?” Dwzgangh naeuz: “Gou rox dungxiek dwg baezlawzyiengh lo, ndaw dungx ‘gulu gulu’ heuh, bouxvunz mbouj miz saek di rengz, hojsouh dangqmaz, vaiqdi ma ranz

gwn haeux.” De doq gangj doq ndwn hwnjdaeuj baema ranz ra doxgaiq gwn lo.

Siujyngz gwed song fag gvak gaen youq baihaeng Dwzgangh. De doiq Dwzgangh naeuz: “Mwngz mbouj rox lu, gou ngoenzngoenz cungj dengj dungxiek. Cij miz dungxiek gvaq, cij rox naed haeux faen ngaenz daeuj ndaej mbouj yungzheih, cij rox swngghoz swheij miz gwn miz daenj couhwdg gvaq ndaej ndei, cij rox bae gaenx guh mbaet yungh.”

Doeklaeng, Dwzgangh ngoenzngoenz cungj gaen Siujyngz bae guh hong, guh hong dauqma le couh gwn song sam vanj haeux. Ciemhciehm dwk, de yied maj yied miz rengz, caeuq Siujyngz doxdoengz maz hong cungj rox guh, naengzganq dangqmaz. Bohme Dwzgangh engq maez lwgdog roxsoq lo.